

## DOMINGU XXXIII TEMPUS KOMÚN – TINAN C

### Tema

Liturjia domingu ne'e nian replete kona-ba sentidu istória salvasaun nian no hateten mai ita katak meta final ne'ebé Maromak lori ita bá mak lalehan no rai foun ksolok nakonu nian, vida definitiva nian. Kuadru ne'e hamoris iha ita esperansa; no husi esperansa mosu atenbarani au enfrenta adversidade no atu luta ba Reinu nia adventu.

Iha *leitura dahuluk*, “Maromak nia manu-ain” ida hato'o ba comunidade ida ne'ebé dezanimada no moris iha apatia katak Jahwéh la abandona ninia Povu. Maromak libertador sei intervein iha mundu, halakon ida ne'ebé hanehan no na'ok moris no halo atu “loro-matan justisa nian” moris no lori salvasaun.

*Evanjellu* oferese mai ita reflesaun ida kona-ba dalan ne'ebé Kreda simu bolun atu la'o tuir, to'o Jezús nia fila hikas ba dala rua. Eskolante sira ne'ebé la'o iha dalan istória nian, iha empenhu ba mundu nia transformasaun, atu realidade tuan lakon no Reinu bele moris mai. “Dalan” ne'e sei hala'o iha difikuldade no persegisaun sira nia leet; maibé eskolante sira sei hetan nafatin Maromak nia tulun no kbiit.

*Leitura daruak* reforsa ideia katak, enkuantu ita hein vida definitiva, ita laiha direitu atu hela iha hahalok baruk nia laran no iha komodizmu, hodi sai indiferente ba kestaun sira mundu nian no evita fó ita-nia kontributu ba Reinu nia konstrusaun.

### LEITURA I – Mal 4,1-2

Naran “Malaquias” la'ós naran própriu ida. Nia signifikadu mak “ha'u-nia manu-ain”; ne'e mak título ne'ebé profeta anónimu ida foti ba nia an. Nia mak profeta ida husi período pós-ezíluku. Iha ninia época, harii fila fali ona Templu (kf. Mal 1,10) no kultu funksiona fali ona – maski la loos (kf. Mal 1,7-9.12-13)... Maski nune'e, entuziazmu ba rekonstrusaun la iha ona; tanba Maromak nia promesa la kumpre, Povu dezanima no monu iha apatia religioza no lakon konfiansa tomak iha Maromak... Sira duvida kona-ba Maromak nia domin, kona-ba Ninia justisa, kona-ba Ninia interese ba Judá. Rezultadu buat ne'e hotu bele haree iha kultu (la iha ona interese) no iha étika (aumenta falla sira, injustisa sira, arbitrariedade sira). Kuadru ne'e, liutiha restaurasaun Templu nian, situa ita iha metade dahuluk sékulu V mK (entre 480 no 450 mK).

“Maromak nia manu-ain” ida-ne'e reaje ho forsa hasoru situasaun ne'ebé Povu Judá nian monu bá. Nia tau sira ida-idak iha sira-nia responsabilidade ba Jahwéh nia oin no ba maluk sira, ezije konversaun Povu nian no reforma iha vida kultu nian. Ninia lójika mak lójika deuteronomista: se Povu ulun toos atu tuir dalan infidelidade ba Aliansa, nia sei haree filafali mate no terus; maibé se Povu fila ba Maromak no kumpre ukun-fuan sira, nia sei koko fali moris no ksolok ne'ebé Maromak oferese ba sira ne'ebé tuir Ninia dalan sira.

Nota ida ho karákteer práttiku: testu ne'ebé ohin apresenta mai ita mosu iha edisaun ikus Bíbliaa nian, ho numerasaun la'ós nu'udar 4,1-2, maibé nu'udar 3,19-20.

### MENSAJEN

Ita-nia testu refere ba “loron tesi-lia nian” (julgamentu) – katak loron ne’ebé Jahwéh sei intervein iha istória, katak harahun aat, injusitsa, opresaun, salan no halo justisa, lialoos manán. Hasoru Na’i nia ahi ne’ebé purifika no hafoun, “ema foti-an no ema aat sira sei sai hanesan du’ut” no Na’i “sei la husik ba sira abut no sanak ida”; iha kontrapartida, ba sira ne’ebé mantein iha dalan aliansa no ukun-fuan nian, “sei mosu loron-matan justisa nian, hodi lori makso’in iha ninia nabilan sira”.

Maromak nia “manu-ain” ko’alia kona-ba “Na’i nia loron” (la’ós mundu nia rohan) – konseitu ida ne’ebé dala barak mosu iha literatura profétika (kf. Am 5,18; Sof 1,14-18; Jl 2,11) atu ko’alia kona-ba momentu intervensaun Maromak nian iha istória, momentu iha-ne’ebé Jahwéh oferese ba nia Povu salvasaun defínitiva... Profeta utiliza linguajen no imajen típika profeta sira-nian – atu husu ba sidadaun sira keta dezanima no lakon esperansa, basá Maromak sei intervein iha mundu atu hamosu fali mundu foun ida. Ne’e mak fundamentalmente, apelu ida ba esperansa: “maski ita moris iha situaun kaos nian, ita mantein fiél ba Jahwéh, basá Maromak sei hamosu mundu foun ida, moris no ksolok nian ba ema hotu”. Imajen sira “ahi” ne’ebé han no “du’ut” ne’ebé ahi han mak ilas Bíbliaa nian komún iha época ne’ebá (liuliu entre autór apokalítiku sira) atu signifika Maromak nia intervensaun libertadora iha mundu.

Ba sarani sira, ita komprende profesia ne’e iha roman intervensaun libertadora Jezús nian: Nia mak “loron-matan justisa nian” ne’ebé nabilan iha mundu no integra ema iha dinámika mundu foun nian – dinámika “Reinu” nian.

## **LEITURA II – 2Tes 3, 7-12**

Ita kontinua lee Surat daruak ba Tessalonisense sira. Ninia autór dirije ba comunidade ida ne’ebé moris ho entuziazmu ninia fiar no fó sasin maka’as no komprometidu iha adezaun ba Jezús nia Evanjellu, maski iha difikuldade no persegisaun nia laran... Maski nune’e, tanba Paulo tenke husik lalais sidade, la permite atu nia halo katekeze kompleta ida no kestaun ruma fiar nian bele dezentolve no sai tasak. Kestaun ida – ne’ebé preokupa liu tessalonisense sira – mak Na’i nia fila hikis ba dala rua.

Iha surat ne’e, ita bele haree katak, sarani balun Tessalónica nian, hodi hanoin katak Na’i mai besik daudaun ona, moris “iha kalohan”, hodi la halo sira-nia devér loroloron nian (2 Tes 2,1-2). Oras ne’e, buat ida de’it ne’ebé iha sentidu mak iha liman, matan no fuan hateke ba lalehan, hodi hein Na’i nia fila hikis iha glória. Atitude ne’e bele komprende di’ak liután iha antropolojia grega nia roman, iha-ne’ebé hanoin katak ema tenke moris hodi hateke ba mundu ideál no espirituál, hodi halai sees husi rai no buat materiál; tuir perspetiva ne’e – servisu ho liman la iha valór ba ema nia konstrusaun no tenke evita ho kbiit tomak... Ne’e mak enkuadramentu ba ita-nia leitura.

### *MENSAJEN*

Autór Surat Daruak ba Tessalonisense sira rejenta totalmente hanoin no atitude sira ne’ebé ho razauun Na’i ne’ebé besik atu mai – moris lakon tempu no la halo buat ruma util. Tuir hanoin semita kondisaun korporál ema nian la’ós kastigu ida; nune’e serbisu ho liman la halo sai katuas, maibé fó dignidade ba ema.

Autór fó nu’udar ezemplu Paulo rasik: nia nunka hili moris baruk-teen, nia rasik kaer serbisu ho nia liman loron no kalan hodi hakole an atu la fó todan ba ema (vers. 8). Maski durante ninia viajen misionária sira, Paulo nunka aseita pagamentu ruma – nune’e hatudu ninia domin sinseru ba sarani sira no ba comunidade sira no laiha interese materiál.

Pasajen ne'e ninia ton ezijente, solene, autoritáriu, basá ne'e buat ruma fundamentál ba armonia iha komunidad. Tanba se iha komunidad ida iha parazita sira ne'ebé moris husi ema seluk nia kolen, lalais de'it komunidad ne'e sei hasoru situasaun insustentavel: sei lakon ekilíbriu, sei mosu konfliktu sira, akuzasaun sira, divizaun sira no estraga fraternidade. Moris iha komunidad ezije atu iha divizaun rekursu sira ne'ebé komunidad asesu ho igualdade; maibé ezije mós, responsabilizasaun membru hotu nian, atu hotu-hotu uza nia don rasik atu serví maun-alin sira no kontribui ba konstrusaun, ba ekilíbriu no armonia komunitária.

## **EVANJELLU – Lc 21,5-19**

Ita iha Jerusalém, loron ikus sira molok paixaun. Hanesan akontese ho sinótiku seluk (kf. Mt 24-25; Mc 13), Lucas mós remata Jezús nia pregasaun ho diskursu eskatolójiku iha ne'ebé kahur referénsia sira ba Jerusalém ne'ebé monu iha funu-balu nia liman no “tempu ikus sira”. Iha versaun Lucas nian, Jezús iha Templu nia oin ho dixípulu sira (iha versaun Mateus no Marcos nian, Jezús iha foho Oliveiras); hodi kontempla fatuk furak Templu nian mak lori Jezús ba katekeze eskatolójika ida-ne'e.

### *MENSAJEN*

Lucas nia diskursu eskatolójiku mak apresentasaun teolójika ne'ebé iha laran iha momentu tolu istória salvasaun nian: Jerusalém nia destruisaun, tempu misaun Kreda nian no Mane Makso'ik nia fila hikak.

Testu hahú ho anúnsiu destruisaun Jerusalém nian (vers. 5-6). Jerusalém mak fatin salvasaun nian tuir perspetiva profétika (kf. Is 4,5-6; 54,12-17; 62; 65,18-25) no iha fatin ne'e mak povu hotu ne'ebé haka'as an atu hetan salvasaun sei bá (kf. Is 2,2-3; 56,6-8; 60,3; 66,20-23). Jerusalém fali hakribi oferta salvasaun ne'ebé Jezús lori mai. Sidade no Templu nia destruisaun signifika katak Jerusalém la'ós ona fatin eskuzivu no definitivu salvasaun nian. Liafoun Di'ak sei haklaken ba parte hotu. Husi ne'e hahú faze foun istória salvasaun nian: “tempu Kreda nian” – tempu iha ne'ebé komunidad eskolante sira-nian, hodi la'o iha istória, fó sasin kona-ba salvasaun ba povu hotu rai nian.

Hafoin mai reflesaun ida kona-ba “tempu Kreda nian”, ne'ebé sei remata ho Jezús nia fila hikak ba dala rua (vers. 7-19). Tempu ne'e sei oinsá loos no oinsá moris tempu ne'e?

Uluknanai, Lucas sujere katak, liutiha destruisaun Jerusalém nian sei mosu mai mesias falsu sira ne'ebé haklaken mundu nia rohan. Lucas aviza: “keta halai tuir sira” (vers. 8); no nia esklaresa “seidauk to'o nia rohan” (vers. 9). Destruisaun Jerusalém nian iha tinan 70 husi tropa sira Tito nian halo sarani sira hanoin katak Jezús nia fila hikak nia loron to'o ona... Maibé Lucas (ne'ebé hakerek durante tinan 80 sira) hakarak halakon iluzaun ida-ne'e; envezde moris iha iluzaun mundu nia rohan, sarani sira tenke preokupa atu moris didi'ak nu'udar sarani hodi kompromete an ba mundu ne'e ninia transformasaun.

Iha fatin daruak, Lucas hateten ba sarani sira sá mak akontese iha “tempu hein nian”: neineik-neineik sei mosu mundu foun. Atu hateten ida-ne'e, Lucas uza ilas apokalíptika; “sei mosu rai-nakdoko maka'as no, iha fatin barak hamlaha no epidemia; sei mosu “sinál oioin iha lalehan” – vers. 11), ne'ebé pregadór populár sira tempu ne'ebá nian uza atu ko'alia kona-ba mundu tuan nia rohan (salan, egoísmu, esplorasau nian) no mundu foun nia mamosuk... Entre tempu Jerusalém ninia rohan no Jezús nia fila hikak ba dala rua, Maromak nia “Reinu” sei hatudu an; mundu tuan sei lakon no sei moris mai mundu foun (eskolante sira tenke haka'as an ba “Reinu” nia konstrusaun). Libertasaun ikus no nakonu sei sei akontese de'it ho Jezús nia fila hikak ba dala rua.

Iha fatin datoluk, Lucas bolu sarani sira-nia atensaun ba difikuldade no persegisaun sira ne'ebé marka dalan istóriku Kreda nian, iha tempu hotu to'o Jezús nia fila hikas ba dala rua. Maski nune'e, Lucas fó hanoin ba sira katak, sira la mesak basá Maromak nafatin horik ho sira; ho Maromak nia kbiit mak sira sei enfrenta inimigu sira no reziste tortura, dadur no mate; ho Maromak nia tulun mak sira bele tahan terus tanba família no belun sira nia laran-makerek... Bainhira Lucas hakerek testu ne'e, nia hanoin ba Kreda nia esperiéncia ne'ebé la'o no luta iha istória atu halo "Reinu" sai realidade no iha luta ne'e, nia hetan terus, difikuldade, persegisaun no martíriu; Liafuan konsolasaun ne'ebé nia husik iha ne'e – liuliu serteza kona-ba Maromak ne'ebé presente no la abandona nia oan sira – sai tulun boot ba sarani sira ne'ebé nia diri je Evanjellu ne'e.

Diskursu teolójiku define katak, misaun Kreda nian iha istória mak fó sasin ba Liafoun Di'ak no harii Reinu. Eskolante sira labele ta'uk: sei iha difikuldade sira, maibé sira sei hetan nafatin Maromak nia tulun no kbiit.